



Nuuk 1. juni 2016

Matumuuna Inatsisartut suleriaasianni §37 naapertorlugu Naalakkersuisunut apeqqutit imaattut ingerlatippakka:

Apeqqutit:

1. Qalerallit avataani pisarineqartut MSC-mik nalunaaqutserneqalerput, siunissami MSC meqqeq sinerissamut qanittumi atuutilertariaqarpa?
2. MSC meqqi sinerissap qanittuanut atuuttariaqarpat qaqugulu atuutilertariaqarpa?
3. MSC sinerissamut qanittumi qaleralinniartut inuussutissarsiutigineranut qanoq pingaaruteqartigaa.
4. MSC meqqi pilersinneqartariaqassappat suliassat suut siusissukkut naatsorsuutigineqarpat naatsorsuutigineqartariaqarpalluunniit?
5. MSC nunatta nunarsuatsinni aalisakkanik niueruteqarnerani pingaarutilimmik inissisimasutut, aalisakkanillu tunisiffissaqartuaannarnissatsinnut aalajangeeqataasutut inissisimasoq Naalakkersuisut uppersarsinnaavaat?
6. MSC aalisakkanut assigiinngisitaartunut sapinngisamik tamanut atuutsinneqartariaqartutut naalakkersuisut isumaqarpat?
7. Naalakkersuisut erseqqissarsinnaavaat MSC-ip atuutsinneqarnera aalisakkat akiinut nalituneruleriartornissaannullu iluaqutaassanersoq?
8. Suut tunngavigalugit, sunalu siunertaralugu MSC Naalakkersuinikkut pingaartinneqarluni ingerlanneqarpa?
9. MSC aalisartunut, tunitsivinnut, tunisassiassanut aammalu nunatsinnut tamarmut sunniutai qanoq erseqqissarneqarsinnaappat?
10. MSC atuutinnikkaluarpat ullumikkut nunatsinni sunniutigisimasinnaasai suut taaneqarsinnaappat?
11. Avaleraasartoorniarneq aammalu ikerinnaasiortunik aalisarneq, minnerunngitsumillu avataasiortuni aalisariaatsit tamaasa eqqarsaatigalugit MSC-p atuutsinneqalernissaa qanoq anguneqassanersoq Naalakkersuisut oqaasertalersorsinnaavaat?
12. MSC tunngavigalugu aalisartut pisassaateqiterutsinneqarnissaat siunertaava?
13. Nunat tamalaat akornanni isumaqatigiissutinik tunngaveqartumik piujuaannartitsinissamik siunertat nunatta isumaqatigiissusiornernik atsiogataaffigisimasai nangittumik naalakkersuisunit nunatta iluani timalersuiffigineqassappat?

(Inatsisartuni ilaasortaq Hans Aronsen, Inuit Ataqatigiit)

Tunngavilersuut:

MCS meqqi nunatsinni aalisarnikkut annertusiartortumik sunnniuteqaleriartorpoq. Nunarsuarmi niuernikkut illuatungeriinni pitsaasumik suleqatigiittoqassappat piunasaqaasersornerit pisariaqartarput, soorlu MSC meqqi taama ittoq. Allaat ilaatigut inuiaqatigiinni aalisarnikkut ileqqut pingaartitallu ilaatigut allangortilluinnarneqartariaqarlutik. Tamannali aaliangerneq avammut tunisatigut naleqarnerulersitsinermut ilaagaangat, aammalu aningaasarsiornikkut siunissamut sivilisuumik attanneqarsinnaagaangat malunnartarpoq naalackersuinikkut suliallit soqutigilluinnartaraat.

Qaleralinniarnikkut aalisarnermi MSC meqqi sinerissami atuutinneqalernissaanut siusinaarluta paaseqatigiillutalu oqaloqatigiissutigeriilernissaa pisariaqarlunnarpoq MSC meqqip atuutsilertariaqarnerannik isumaqaraanni pingaaruteqarlunnarpalluunniit.

Siuliani oqareernittut ileqqut pingaartitallu allangortissagaanni pisarialimmilluunniit allangortissagaanni pitsaasumik paasissutissinneqarnissaq pingaarluinnartuusooq maani ilisimavarput.

Kissaatigaara apeqqutit ullut qulit qaangiutsinnagit Naalackersuisumiit akineqassasut.